

# 1 Kin

## *Waeuwa uawa*

Buka ema bedewe gagalo ipauida natadea girumantona winei. Buka nepa 1 ita 2 bedewe warere Dawid boleno ita me otopa Solomon warerelene mamba aupawa wadene ita gagalowa natawa ipa buka nepa 3 ita alene 11 bedewe wadia ipa ambi Solomon Israelwa oniadewasamona, ita ambi oniadewasa dewawa sa debamalena umanawa wade. Ita do wadia me ambi God duwa Ierusalem bedewe waden. Ita gagalo natadeawa bedewe ipa buka nepa 12 ita 22 bedewe wadia ipa ambi Israel apanawa empuempuntone dan nata seganton, Israelwa wadi eneia deneuve antone waimoiena ita Iuda apanawa ipa owa deneuve antone waimoiena. Ita dan sa nata muba warereu nambenambe. Giruma ema ipa warere ema nata gagalou waewaleide. Ita no waeuwanedia warere dainea Iawe God aiawa ruawalen ambi Dawid dewalena rua. Tane warere dainea Iawe God adiananasane ita god lagawaau sumanaibulene wadaposimodie.

## **Gagalo uwau sonabamoia**

Warere Dawid boleno ita me otopa Solomon warerelen (2.10-12)

Solomon God iririsan insaisa euda wanepia baiwa (3.3-5, 7-14, 16-28)

Solomon apama oniadewasamodia dewawa inilene debamalen (4.20-21, 25)

Solomon God duwa wadene ita raupariwalen (5.1-6; 6.1, 7, 11-14; 8.1, 3-6, 10-11, 22-23, 27-30, 41-43)

Tawo Seba onedia iwa dea debama alen warere Solomon ewepia baiwa (10.1-9)  
 Solomon God adiananasane en (11.1-5, 7-13, 26-33, 35, 40)  
 Solomon boleno ita me otopa Reobeam wareren-  
 len (11.42-43)  
 Apana empuempuntone uwa nata seganton,  
 Israel ita Iuda (12.1-20, 25-31)  
 Warere Eiab God adiananasane ene ita god lagawaau sumanaibulene wadaposimodie (16.30-33)  
 Peroweta Elaia obu ita otopa do saumon (17.1, 8-24)  
 Iawe God wadi Kamel iwa osowe god Baal perowetawa do onantone ita aimon (18.1-2, 17-46; 19.1-21)

## 2

### *Warere Dawid bolena gagalowa*

<sup>10-11</sup> Warere Dawid Israel apanawa oniamodie, me bauta bola debama Ibron bedewe waina enawa 7 ita Ierusalem bedewe waina enawa 33. Tane me oniamodia enawa awodealena 40 waden. Me wandie boleno mo me nosinosiwa wineiawo bola ebowa Dawid bolawa Ierusalem bedewe dobontoiena.<sup>◊</sup>

<sup>12</sup> Tane Solomon mamba Dawid aupawa wadene Israelwa oniamon. Ita God me sausano badowa enen.

## 3

### *Solomon aten insaisawa euda baiwa Iawe God iririsade*

---

<sup>◊</sup> **2:10-11:** 2 Samuel 5.4,5

<sup>3</sup> Solomon Iawe God nuawadawadasana baiwa mamba Dawid anaanawa ruawaleidie wandie. Tane dea os Iawe God dima wadia mai ruawalepona, dia. Me aleidie god lagawaau wadaposimonia watawa osouwo pue puloleidie ita do piupi sudie.

<sup>4</sup> Mo bola debama Gibeon bedewe antoie wadapos debama dewasai, sa baiwa warere sape alene pue 1,000 amonalene Iawe God wanen.

<sup>5</sup> Solomon bola debama Gibeon bedewe wandio tadino Iawe God me mampe auen bedewe segalene wanase, “E dima meneede? Dewa uduudu meneedia iririwaitawo eneepa.”

<sup>7</sup> Solomon Iawe God sipoassane wanase, “O Iawe ne Godna e ne mamana aupawa ituneano warerentedina. Ne ipa oto kerauda rua, mai atenteapona ambi apana oniamopa.

<sup>8</sup> Ita e apaa sonabalala bedeuwo ne e nolaa dewalala ita mo ipa uaraia mai wisiau rua, dia.

<sup>9</sup> Mai mida da meba mukawa mampe e dana ema debama oniamopia rua, dia. Sa baiwa e aten insaisawa euda neawo euda ita kadiwa bedewe ewaewa atenteape e apaa oniadewasamopa.”

<sup>10</sup> Solomon aten insaisawa euda iririwaleno Iawe God nuawa eudidalen.

<sup>11</sup> Sa baiwa God me sipoassane wanase, “E mai bola emawo wanwana daumalepia, ba ete maurawa mampe debamaitaa ba wenawenaa onau enee nanaumoa iririwaitapona, tane aten insaisawa euda wadee mampe apaa oniadewasamoa iririwaiten,

<sup>12</sup> sa baiwa e dima iririwa waana ne eneepaa rua! Ne e insaisa euda ita aten e eneepa rua, mai

mida da mapo epe wanapona ita mai mida da ando epe wanapa, dia.

<sup>13</sup> Tane e mai maura debama ba eboa debamalepia baiwa iririneapona, ne ideita nitu ema uduudu eneepatuwapi. Tane e inawaa wanempa bedewe mai warere da mane ita ebo debama e wadaana rua wadapu, dia.

<sup>14</sup> Tane e ne aiana etone ita anaanana uduudu ruawaitona e mamaa Dawid dewalena rua ne e dewaepo ena dauma wana.”

*Solomon aten insaisawa euda mampe apana oniamon*

<sup>16</sup> Tane ema aupe ioto nata ninalala wanwambu kadilen. Sa baiwa mo warere Solomon mampe wimone me iririsaiena mo saibu dodomanasapi.

<sup>17</sup> I ninalala dea bautaa wane wanase, “Warere, i ema ne nata du dea bedewe wainitee ne oto gamonten.

<sup>18</sup> Tane walama natadea diantono imonemba i ema do otopa gamosan ita me ne nata nuba os du sa bedewe wainite mai mida da, dia.

<sup>19</sup> Tane tadino me otopa osowe koirewalene ainbolen.

<sup>20</sup> Ita tadino itu awawanteno me onanawo wisene oto ne tainawo ituleidia wadene alen. Ita me otopa bobopa wadene tainawo itune en.

<sup>21</sup> Imonemba ne enanawinene oto amamasapa baiwantene tane oto bobopa ewana. Ita walama sapawa bedewe oto ewanadewanten, ema apa mai ne otona.”

<sup>22</sup> Tane i ninalala wawea wanase, “Dia! Oto bobopa ipa e otoa ita inawaa wandia ne nebaana.”

Tane i ninala bautaa aiawa mukalene wanase, “Dia! Oto bolena ipa e manawoa, oto inawaa ipa ne nebaana.” I ema nata warere Solomon danawe epe wawantoie.

<sup>23</sup> Sape warere wanase, “Ema epe, i bautaa wadia da, ‘Oto bobopa ipa e manawoa, oto inawaa ipa ne otona.’ Ita i wawea wadiase, ‘Dia! Oto inawaa wandia ipa ne mainawoa ita oto bolena sa ipa e manawoa.’ ”

<sup>24</sup> Ita warere nolawa dewalala diamone wanase, “Isima moamoaua wadane neana.” Sa baiwa mo Isima wadane warere mampe wimoiena.

<sup>25</sup> Tauma warere wanase, “Oto inawaa sawano isuweno waiwa nata segantopu ita waiwa wadane i da wanana ita waiwa da sowa wanana.”

<sup>26</sup> Ita oto sa inawaida oto nuawadawadasana baiwa aiawa debama mampe wanase, “Debama, oto mai bosaa me wadee i ema wanaa.”

Tane i da enedia wanase, “Dia! Toaisudepio waiwa nata segantopu ita oto sa mai ne ba me mampea segalepi.”

<sup>27</sup> Tane warere nolawa dewalala diamone wanase, “Oto mai bosana me wadane i bautaa wanana, me ipa oto inawaida.”

<sup>28</sup> God aten insaisawa euda warere waneno kadi saiwa dodomanasadia umanawa Israelwa etane ita atentoiena, sa baiwa mo me wiwirawanton.

## 4

*Solomon Israel apanawa oniadewasamon*

**20** Iuda ita Israel apanawa uaraidanton mo ewaewau owa tampa nelawa rua. Mo mampo nana ita esa rua os, ita mo nuaeuntoie.

**21** Warere Solomon bola uduudu apanawa oniamon Eupirates esawa oso ualene, ita Pilistan apanawa waimoia bolauwo ita iene alene Isibtiwa enenituden.<sup>✳</sup> Apana sa amonau waaubantoie Solomon mampe inawaa wandia walamawe ita do mo me aiawa ruawantoie.

**25** Ita warere Solomon inawaa wandia walamawe bola debama Dan iene alene bola debama Beasibawo wisena Israel apanawa uduudu muba bolau dewasaie iraintoie waimoie.

## 5

### *Warere Solomon puraiwa imaamon God duwa wadepia baiwa*

**1** Mapo warere Dawid inawaa wandia walamawe me nuawadawada sowaida ipa warere Iram, me bola debama Taire apanawa oniamodie. Tane warere Iram, Dawid otopa Solomon Israel apanawa warereu sanaa enena umanawa etene nolawa apanawa waaubamono anton me auwasapua baiwa.

**2** Ita warere Solomon gagalo wanaubeno leulene warere Iram mampe alen me wanase,

**3** “E ateiten ambi ne mamana Dawid uwa daitada uaraia enane panane do onantioie. Sa baiwa me mai rua ita wadaposi duwa wadapona Iawe God wadaposisampa baiwa. Me Iawe God oniedie emalawoa apala bauta

---

<sup>✳</sup> **4:21:** Bumpai 15.18

aimopie nanamopio tauma me God wadaposisampa duwa wadepi.

<sup>4</sup> Tane tauma Iawe ne Godna wanwan euda obasa nen bola uduudu bedewe ita ne onana eneia apanawa dia do empuempu dia.

<sup>5</sup> Sa baiwa ne tauma insedina wadapos duwa wadapa Iawe Godna wadaposisapina baiwa. Ne mamana Dawid diena rua, me wanase,

‘Ne ando e otoa dewasapo e aupaa wadepie warerelepi. Ita me ne ebona wadaposisampa duwa wadepi.’<sup>5</sup>

<sup>6</sup> Sa baiwa e nolaa wadeia apanawa waubamowo Lebanon tawowa bedewe antopue ia badowa eboa sida waia tomopu ne baina ita nolana wadeia apanawa do awodea nolantopu. No ateten e apaanaa bola debama Saidon bedewe waimoia ia totowa atendewanton, mai no Israelwa ruamba. Sa baiwa e ne dianea mane ambi rua e nolaa apana wanamopa ita rua ne malesamopa.”

*Sa baiwa Solomon ia sa warere Iram mampe gimaramon, ita Israel apanawa uduudu 30,000 otamono me sausane God duwa wadawadawa baiwa ia ita dewa isiwa do otamoienia.*

*Do Solomon apala 150,000 otamone nola bedewe teamon, ita mo seu debamau nopuiamompa God duwa wadapua baiwa.*

## 6

### *Warere Solomon God duwa wadede*

<sup>1</sup> Warere Solomon Israel apanawa ena natadea oniamon ita ena 4 bedewe uaboa natawa bedewe ebowa waia Siwi, me Iawe God duwa ualene

---

<sup>5</sup> 5:5: 2 Samuel 7.12,13

wadedie. Tane Israel apanawa Isibtiwa waimoie ene antone ena 480 diasaieno aupe Solomon nola ema ualen.

<sup>7</sup> Mo du wadawada baiwa nambe antone seu dogo tone bedewe otawiamoienna, ita nopuiamoiie ipawa du wadawadawa bolawe mai mida widi ita ama mampe ia tompe ba seu nopuamompe moinantopu, dia.

<sup>11-12</sup> Tane Iawe God warere Solomon du wadedia umanawa diene wanase, “Naita e ne aiana etone ita anaanana uduudu ruawaitona, ne sauana badowa mamaa Dawid mampe wana manawo ipawanasapa.

<sup>13</sup> Ita ne apanana Israelwa bedeuwo wainepina ita do mai emopa, dia.”

<sup>14</sup> Ita warere Solomon God duwa wadedia disaan.

## 8

### *Mo sauau badowa bokisiwa wadane God duwe itui*

<sup>1</sup> Warere Solomon Israelwa eiau uduudu, uwa daitada ita dan daitada uwaula diamona Iawe God sauawa badowa bokisiwa Dawid bolawa debamawa Saion bedewe awanepue do Ierusalemwa wimpu.

<sup>3</sup> Tane Israelwa eiau uduudu wimoieno pirisi sauau badowa bokisiwa wadanaposideiena.

<sup>4</sup> Pirisi ita Liwai damba apanawa Iawe God sauawa badowa bokisiwa ita ape kakaiwa do

nituwa kakaibu awanamone God duwa bedewe  
odeiena.

<sup>5</sup> Warere Solomon ita Israel apanawa uduudu  
saua badowa bokisiwa danawe enane sipsip ita  
kau uaraia pulontoie, pue ema mai wisiau rua  
uarakadinton.

<sup>6</sup> Tauma pirisi Iawe God sauawa badowa  
bokisiwa awaŋene bola kakaiwaida bedewe  
God duwe odeiena ita kerubim mabupa atowe  
teamoiena.

<sup>10</sup> Tane pirisi bola kakaiwa ene antono giou  
debamaia iene Iawe God duwa nopesan.◊

<sup>11</sup> Ita giou sa pirisi bodamono nolau  
enatuwaiena ipawa Iawe God sapawa debama  
du sa nopesan.

### *Warere Solomon Iawe God auwasade*

<sup>22</sup> Tane warere Solomon wata danawe enena,  
sa ipa me Iawe God danawe eneno ita apana  
uduudu me adiwe eneiena. Solomon witapa  
uboo wadenposie rauparilen.

<sup>23</sup> Me rauparilene wanase,

“O Iawe Israelwa Godiu, mai God da e ruan  
uboo wainipona ba tawo emauwo wainipona,  
dia. E dima sauaitena rua walama uduudu  
dewasaiana, e walama uduudu apanaa nu-  
awadawadamoiana, apana mida mo nuau udu-  
udu mampe e aiaa eteie ruawantoia.

<sup>27</sup> Iawe God tawo ema osowe e wana rua, ba?  
Uba ema mai debamalepona e Wadeepitudepi!  
Sa baiwa wadapos duwa ne wadana bedewe e  
mai wana rua, dia.

---

◊ **8:10:** Ekisod 40.34,35

<sup>28</sup> Iawe ne Godna, ne e manawo iedina dima raupari bedewe iririedina ete ita saunea.

<sup>29</sup> E du ema umanawa ema epe waana, ‘Ne ebona du ema bedewe winompa.’ Sa baiwa wadapos duwa ema walama uduudu oniena. Ne naina leusapine wadaposi duwa ema mampesapine rauparintepino etanena.

<sup>30</sup> Tane no nainimba bola ema itunta ne ita e apanaa Israelwa do rauparimba etona. E uboo wainiana ita rauparimba etone kadimba insadabuamona.

<sup>41-42</sup> Tane bola da nambea apanawa mai Israelwa e eboa debama, mukaa ita dewa debamau dewamoana umanawa etapu. Mo mida bolau nowadawo wadapos awa ieia wimopue nambu du ema mampesapue manawo rauparintopu.

<sup>43</sup> E bolaa uboo wainiana, mo raupariu etone dima iririwantoia wanamona. Ita tawo osowe wanwanlala atentopue e eboa wadaposisapu, no Israel apanawa dewantitana rua. Mo atentopu du ema ne wadana ipa e wadaposia duwa.”

## 10

### *Tawo Seba warerewa iwoa Solomon warewa aleide*

<sup>1</sup> Tane tawo Seba apanawa warereu iwoa Solomon ebowa debamaleidia ita do Iawe God wiwirawaleidia umanawa etene warewa alen. Me menasana warere Solomon aten insaisa euda wadena rubusapie ewepi, sa baiwa waitara uara mampe badowa me diedie.◊

---

◊ **10:1:** Matiu 12.42; Luk 11.31

<sup>2</sup> Me nolawa apanawa uara ita kamel banlamono anton ita do nitu nana eusampa bunamawa, gold eubu ita seu uwataubu eubu malesau debamaia awanamone anton. Me alene warere Solomon auwasane ita me nata gagalonton dima uduudu nuawa bedewe insamodia wano eten.

<sup>3</sup> Solomon me waitarawa uduudu sipoa wamondewalen, mai da koasapona, dia.

<sup>4</sup> Tawo Seba warerewa Solomon insaisawa euda ewene ita do warere duwa wadena,

<sup>5</sup> tane do nana me watawa osowe wineia, ita nolawa apanawa debamau wata tampe waimompa bolawa, do nolawa apanawa debamau gara eubuida tautaula, ita wain reduwa wadeie amonantoia apanawa ita do Iawe God duwa bedewe Solomon pulo amonaleidie wata osowe itudia ewamone memesaidental.

<sup>6</sup> Ita me warere Solomon diene wanase, “Ne bolanawo wainedine e insaisa euda ita dewa debamau uara dewamoiana umanawa os etedine. Tane tauma atenten dewa apa ulaipa segaleide.

<sup>7</sup> Bauta ne gagalo sa etedine mai sumanaiwantapona, tane tauma ne winene emanawoido e insaisaa euda ita maura debamakadilena ewana mai e umanaa ne dianeieno etana rua ewampona, dia.

<sup>8</sup> E apanaa nuaeuntoi ita nolaa apanawa debamau walama ruawantoie danaawo eneie aten insaisawa euda waiano etei.

<sup>9</sup> Iawe e Godia ne wadaposisadina. Me e manawo nuawa euleide ita me e ituena Israel apanawa oniamoa. Me mo nuawadawadamode, sa baiwa e itueno warereiten ita insaisa euda dewa intawe ulaipa dodomana mampe mo oniamoiana.”

# 11

## *Solomon Iawe God adiananasade*

<sup>1</sup> Tane Solomon Isibt warerewa anoopa nuawadawadasadie ita bola da nambea iotopa do nuawadawadamodie. Me tawo Moab, Amon, Edom, do bola Saidon ita Itai iotopa nuawadawadamodie.◊

<sup>2</sup> Iawe God Israel apanawa bola ema uduudu umanau badowaida diamone wane wanase, “E bola ema iotopu mai naimona ipawa naita e mo naimona mo e nuala teinepuo mo godiu wawoitana.”◊ Tane warere Solomon gagalo sa etendabue ioto nuawadawadaidamodie.

<sup>3</sup> Warere Solomon manamanainapa uduudu 700 mo ipa warere anoanopu. Ita do nolawa iotopa 300 mo ipa me manamanainapa. Ioto ema me nuawa teineieno Iawe God nuawadawadasadia en.

<sup>4</sup> Tane warere Solomon gulauleno manamanainapa me dewasaieno mo godiu da wawo aleidie wadaposimodie. Me mai ulaipa mampe Iawe God os sumanaiwalepona mamba Dawid rua, dia.

<sup>5</sup> Mo bola debama Saidon apanawa godiu iwoa ebowa Astoret ita Amon apanawa godiu ebowa Molek wawolene wadaposimodie, god Molek ipa kadiwaida.

<sup>7</sup> Wadiwa Ierusalemwa omo wisedia deneuve warere Solomon Moab apanawa godiu kadiwaida Semos ita Amoniwa godiu kadiwaida ebowa Molek wadaposiu bolau dewamodie.

---

◊ **11:1:** Diutor 17.17   ◊ **11:2:** Diutor 7.3,4

**8** Me wadapos bolawa dewamon me manamanainapa uduudu bola da iotopu baibu. Ita sape mo antompe piupiu sumpe ita pulontompa mo godiu mampo.

**9-10** Iawe God warere Solomon mampe walama nata sabamolene badowa diena me mai god lagawaau wawolepi, tane me Solomon diena mai ruawalepona, me Israelwa Godiu adiananasane en. Sa baiwa Iawe God me mampe nuawa kadiidalen.

**11** Me Solomon diene wanase, “E ne sauana badowa anapunden ita do anaanana mai ruawaitapona, dia. Sa baiwa ne e Israelwa onioniau mukawa eneena manawo wadapaaubepo e nolaa apanawa da wanapa.

**12** Tane ne e mamaa Dawid nuawadawadasadina baiwa tauma inawaa wainiana mai epe dewanteapa. Ita ando e otoa mampe onioniau mukawa sa ne wadapaaubepo.

**13** E otoa Israel apanawa oniamompo bedewe ne mai mo uduudu otaubamopa. Tane dan dea os epo me mukawa atowelepio oniepi. Dawid ipa ne nolana dewalala ita bola debama Ierusalem ne neba baina sonabene ituna. Sa baiwa ne epe dewasapaa rua, ne dan dea epo me oniepi.”

### *Ieroboam warere Solomon onawa enede*

**26** Nebat otopa Ieroboam warere Solomon amboitusan. Me Solomon nolawa dewalala uwauleidia apanawa debama bola debama Sereda Eparaim bolawa bedewe wanwanla. Ita inawa ipa obu, me eboa Serua.

**27** Ema epe inta dewa segalen: Solomon bola debama Ierusalem gonaawa tutuwadie nagana-galeidia pasisabodamodie. Bola sa ipa me mamba Dawid bolawa debama.

**28** Ieroboam nola dewasapia atemba apanawa, me nolawa euda dewamodio Solomon ewene ituno nola onioniau apanawa segalen. Me Eparaim ita Manase damba Iosep nosinosiwa mida nolantoia uwaulepia apanawa segalen.

**29** Walama dea Ieroboam Ierusalem ene aleidie into peroweta Aisa donsan. Me bolawa debama Silo bedewe wanwanla. Mo nata into bola sawanaida bedewe dontonton tane Aisa garawa onapea sanaa taudie.

**30** Aisa garawa onapea sanaa taudia wadenaubene siosawialeno kepakepa uduudu 12 seganton.

**31** Ita me Ieroboam diene wanase, “E gara kepakepa 10 eba baia otamo. Iawe Israelwa Godiu wadiase,

‘Solomon Israel apanawa oniamodio waimoia mukawa me mampe wadepiaubepi. Ita e Ieroboam dan uduudu 10 manawomopio oniamoa.

**32-33** Solomon, ne adianananene ita me Saidonwa godiu iwoa ebowa Astoret ita Moab apanawa godiu ebowa Semos ita Amon apanawa godiu Molek wawoleidie wadaposimode. Me mai Iawe God intawa asiisi alepona ita me mai euda dewasapona me mampe. Tane me gagalowa mai etapona ita do me anaanawa ainpunden. Me mamba Dawid Iawe God sumanaiwalena rua me mai dewalepona. Tane Dawid ipa Iawe God nolawa dewalala ita Israelwa dambu daitada

bedeuwoe me bola debama Ierusalem sonaben me meba baiwa. Sa baiwa mo bedeuwo dan uwa dea epio Solomon nosinosiwa atouwontompo oniamompa.

**35** Ita me Israelwa Solomon otopa mukawa atowe waimoia otaubamopie dan uduudu 10 eneepo oniamoa.’ ”

**40** Warere Solomon Ieroboam bosapona baiwaleidie tane me sawe weuwane warere Sisak mampe Isibt bedewe alen. Solomon inawaa wandio rua me sape wankasalen.

**42** Ierusalem bedewe warere Solomon Israel apanawa uduudu oniamono enawa 40 dialen.

**43** Tane me boleno mo me mamba Dawid bolawa debama bedewe dobontoienia. Ita me otopa Reobeam aupawa wadene warerelen.

## 12

### *Israel apanawa warere Reobeam onawa enei*

**1** Warere Reobeam bola debama Sikem bedewe alen Israel apanawa uduudu sape onioniantoia me wisepio itupuo warereu segalepi.

**2** Nebat otopa Ieroboam warere Solomon sawalene alene Isibtiwa wandia gagalo ema etene leulene wisen.

**3** Israel apanawa uaula me gagalowa wanaaubeiena wisepi, ita Ieroboam Israelwa uduudu do warere Reobeam mampe antone diane waienase,

**4** “E mamaa Solomon no nola saiwaia nenedie tane e dieeitana nola saiwa tekateka nenawo e atoawontato onianeaa.”

**5** Tane Reobeam sipoamone wanase, “E ene aitane walama natadea diantopuo leutane mainawo wilena ita gagalola sipoa dialepa.” Mo epe etane ita ene antoienaa.

**6** Mo antoieno aupo Reobeam apava eiau mida warere Solomon inawaa wandio sausaia apava do gagalonton. Me mo waitaramone wanase, “Apava ema wimopuo ambi wape diamopa?”

**7** Tane mo waienase, “Naita e apava saumoa meneempa mo dima waia asiasi dewasaa ita mo e atoawontopuo oniakasamoa.”

**8** Ita Reobeam mo gagalou etene mai ruaulepuna, me ene alene apava sanaau do gagalonton. Mo ipa me mu sosowa me sausaia apava.

**9** Me mo waitaramone wanase, “Ne ambi dewanteapa, apava waia ne nola tekateka wanamopa mai nola saiwaia ne mamana walamaue wanamodia rua wanamopa. Ne ambi wape diamopa?”

**10** Ita apava sanaa me diane waienase, “Mo e dieiena, ‘Nola saiwa tekateka nena’ ita e mo diamoa,

‘Ne apava badowaia wainedina mai mamana rua.

**11** Ne mamana sai debama enaleno awanelana tane ne sai osowesape enalepa. Me tai mampe epalen, tane ne tai gedaragedaraaua mampe epalepa.”

<sup>12</sup> Walama natadea diantono Ieroboam ita apapa uduudu me diamona rua leuntone wimoiena Reobeam gagalowa etapua baiwa.

<sup>13</sup> Warere Reobeam apapa eiau wasaubu gagalowa mai etapona, sa baiwa me badowa apapa mampo gagalolen.

<sup>14</sup> Ita me apapa sanaa wasaubu gagalowa asiasi apapa diamone wanase, “Ne apapa badowaia, mai mamana rua! Ne mamana sai debama enalen tane ne e sai debamawaida enalepa! Me tai mampe epaledie tane ne tai gedaragedaraaua mampe epalepa!”

<sup>15</sup> Iawe God epe menasana rua segalen, sa baiwa warere apapa aiau mai etaeta menasapona. Iawe God bola debama Silo perowetawa Aisa bedeweinta Nebat otopa Ieroboam mampe gagalolen. Me wana, Solomon otopa mampe apapa oniamodia mukawa wadepiaubepi. Ita Iawe God peroweta Aisa bedeweetee wana rua segalen.

<sup>16</sup> Israelwa uduudu warere mo gagalou etaeta dabualeno ewane me diane waienase,  
“No ipa mai Iese otopa Dawid bedeweetee!

No mai me damba wainipona!  
Israelwa, eno nuba bolambobolambo ana,  
Dawid bedeweetee Reobeam meba apanawa oniamopi!”

Ita mo epe wane ene antoienaa.

<sup>17</sup> Ita warere Reobeam Israelwa Iuda bolawa debama bedewe waimoia me atowentono oniamodie.

<sup>18</sup> Tane apapa ebowa Adoniram Israelwa nola baiwa auweia me diamodie oniamodio nolantoi, mo warere Reobeam nolawa dewalala. Sa

baiwa Reobeam me wanaubeno Israel apanawa mampo alen otamopie wimpuo me atowentopuo oniamopi. Tane mo seu mampe me bosaiena. Ita warere Reobeam tauwadea turaka pue mampe teiteinalala osowe odene waine Ierusalemwa alen.

<sup>19</sup> Walama sawo ita odene tauma Israel apanawa einapue Ieroboam atowentone bola Iuda bedewe wanwanla Dawid bedeweа do emalawoantoie waimoie.

<sup>20</sup> Tane Israel apanawa Ieroboam Isibtiwae leulene wisena umanawa etane mo apava uduudu diamoieno auweiena. Ita mo me dieieno wiseno ituieno Israelwa uwa daitada uduudu oniamon. Tane Iuda damba os Dawid bedeweа atowentono oniamon.

### *Ieroboam Iawe God adiananasan*

<sup>25</sup> Eparaim nosinosiwa bolau bedewe Ieroboam bola debama Sikem gonaalene bodene bedewe wandie. Bola sawo wadi uara enei. Me sape wandie ene alene bola debama Penuel gonaalene boden.

<sup>26-27</sup> Tane walama dea Ieroboam wandie ema epe insedie, “Israel apanawa uduudu Ierusalemwa Iawe God duwa bedewe pue pulontompe sumpa baiwa antoi. Apava ema antoia, Dawid damba bedeweа atowentopue nuau leusapuo mo apava bola Iuda warerewa Reobeam mampentopu. Ita mo ne boneapue me dewasapuo ne aupana wadepie warerelepi.”

<sup>28</sup> Sa baiwa warere aten apanawa do gagalonton dima dewasapu, ita me gold mampe kau inainamba rua kokoitau nata dewamon. Tane apava diamone wanase, “E Ierusalem awa

atile pokaida eteilana, e Israel apanawa, godila ema ewanee mapo Isibt bedewe banlaleno nole-lana.”<sup>28</sup>

<sup>29</sup> Ita me kokoitau sa dewamona otene dea bola debama Betel bedewe itun ita da bola debama Dan bedewe itun.

<sup>30</sup> Me epe dewaleno apala kadi dewasaiena. Apala nowadawo Dan bedewe kokoitau wada-posiwa baiwa anton.

<sup>31</sup> Ita do Ieroboam wadapos bolawa wadi uarau iwa oso dewamon ita pirisi dan daitada bedeuwo sonabamone teamon. Mo ipa mai Liwai damba bedewea, dia.

*Walama sawo Ieroboam warerelen Israel bedewe. Ita Reobeam warerelene Iuda bolawa oniedie. Tane Ieroboam warerelene waina enawa 17 waden. Reobeam warerelene wandia walamawe Iuda apanawa god lagawaau wadaposimoie ita Isibt apanawa wimone Iuda apanawa onau eneiena ita Iawe God duwa bedewe ita do warere duwa bedewe puraiwa eubu uwataubuida otene antoieno. Reobeam ita Ieroboam walama uduudu onantoie.*

*Tane Reobeam boleno aupawe me otopa Abia warerelen ita me bola Iuda warerewalene waina enawa natadea waden. Me do Ieroboam onawa enedie. Reobeam boleno aupe me otopa Asa warerelene Iuda onien. Ita Asa warerelene waina enawa 41. Me warere euda Iawe God wadaposisadie ita Iuda apanawa godiu lagawaau wadaposimoia onawa enedie. Asa walama uduudu Israelwa warereu ebowa Baasa do onantoie. Ita Asa boleno me otopa Iosapat bola Iuda warerewalen.*

*Ita bola Israel bedewe Ieroboam otopa Nadab,*

---

<sup>28</sup> **12:28:** Ekisod 32.4

*me warere kadiwaida mo mida me wawe wimone warerentoiena mo do kadiuida. Nadab warerelene bola Israel oniena enawa nata dianton. Tane warere Baasa enene warere Nadab ita do apama isiwa Ieroboam duwa bedewe wanwanlala bomon. Baasa bola Israel warerewalene waina enawa 24 wadeno bolen. Ita ema aupe me otopa Ela warerelene ita Israel onieno enawa nata dianton. Tane me sorodiawa ona ualeidia apanawa ebowa Simri enene me bosane aupe meba warerelen. Ita ema aupe wiki dea dialeno Israel apanawa sorodiau ona ualeidia ebowa Omri warerelen. Tane Simri meba enelene bolen. Ita Omri warerelene waina enawa 12 diantono otopa Eiab warerelen. Ita Eiab warerelene waina enawa 22 dialen.*

## 16

### *Israel apanawa warareu Eiab*

<sup>30</sup> Omri otopa ebowa Eiab Iawe God mampe dewa kadiu uaraia dewamodie mai warere bau-taa ruau.

<sup>31</sup> Me kadi dewasadie insediase dewa da ker-auda dewasade Nebat otopa warere Ieroboam kadiwa dewasana rua. Tane do dewa da kadiwaida dewasana ipa me Saidon warerewa Etibaal anoopa Iesebel naisen ita laga godiwa Baal wadaposisadie.

<sup>32</sup> Eiab bola debama Samaria bedewe Baal wadaposiwa duwa waden ita do bedewe pulon-tompa watawa dewamon.

<sup>33</sup> Ita do me god iwoa ebowa Asera\* kokoitauwa wadaposisampa baiwa dewasane eindoden. Eiab

---

\* **16:33:** Asera me ipa god iwoa bola Mesopotamia, Isibt, Poenisia ita Siria apanawa wadaposisaia godiwa. Me ipa Kanaan apanawa godiu Baal manainapa.

dewa uaraia dewamona mampe Iawe Israelwa Godiu nuawa kadiidasan mai warere bautaa ruau.

## 17

### *Elaia maraapore segalepia umanawa wade*

<sup>1</sup> Peroweta ebowa Elaia\* Giled bolawa bedewe Tisibiwa wanwanlala warere Eiab mampe alene wanase, “Ulaipaida, Israelwa Godiu wanwankasalala ita ne ipa me nolawa dewalala ebowe wadina, unu mai wapi ita do ena ema ieia bedewe mai nirurulepi ideita ne wapo rua unu wapi.”<sup>◊</sup>

*Elaia dima wana ruaida segalen. Walama dawmawa unu mai wapona ita nana dialen.*

### *Obu bola Sarepatiwa wanwanla*

<sup>8</sup> Tane Iawe God Elaia diene wanase,

<sup>9</sup> “E aie Sarepatiwa wanempa bola debama Saidon tampe. Sape ne obu diana nana sauepio naa.”<sup>◊</sup>

<sup>10</sup> Sa baiwa Elaia Sarepatiwa alene bola gonaawa moape wisene i ia nolaleidio ewen. Ita me diene wanase, “Rua ba dia, esa utee neawo napa?”

<sup>11</sup> I ene esa utepia baiwa aleidio me apa mampe wanase, “Rua ba dia, bured do wade wine nea?”

<sup>12</sup> I me sipoasane wanase, “Ulaipa e Goda wanwankasalala ebowe wadina, ne mainawo mai bured da wineipona, dia. Ne parawa didiwaida ita mena kerauda mainawo winede. Tauma ne ia nolantedina duwa anteape neba ottona nata

\* <sup>17:1:</sup> Elaia ebowa ipawaida ipa *Iawe me ipa God.*      ◊ <sup>17:1:</sup> Iems 5.17      ◊ <sup>17:9:</sup> Luk 4.25,26

baimba laulantapo nate aupe no di wainente omana bowantata.”

<sup>13-14</sup> Tane Elaia me diene wanase, “Mai inguguraitaa! Iawe Israelwa Godiu wadiase,

‘Parawa onta bedewe ita do mena dugi bedewe wineia mai diantopu, dia, ideita Iawe God walama ituna osowe unu wapie irai butamopio inintopu!’ Sa baiwa ne dima waana rua duwa aite dewasaa ita ne baina bauta parawa ker-auda nuite wade winea. Ita moawa winompa nuitaa e otoa nata baila.’ ”

<sup>15</sup> Me alene Elaia wana rua dewasan. Ita ema aupe, walama uduudu Elaia ita obu otopa nata baibu nana winedio os waimoie.

<sup>16</sup> Iawe God sauawa Elaia bedewesano wana parawa onta bedewe ita mena dugi bedewe mai diantopona.

<sup>17</sup> Tane walama isiwa diantono obu ema meba duwa bedewe wandie otopa kero debama wadaidasano ita bolen.

<sup>18</sup> Sa baiwa me Elaia diene wanase, “E ipa God perowetawa, e dima baiwa dewa ema dewasaana ne mainawo? E mape wiena ne kadina euwanee ita do otona bosaa baiwa, ba?”

<sup>19</sup> Elaia sipoasane wanase, “Otoa wadee nea.” Me oto inawa mampe wadene awanene me wandiawo du iwa osowe odene alen. Ita me ituleidia bolawe wadenaisie itun.

<sup>20</sup> Ita me Iawe God mampe rauparilene wanase, “Iawe ne Godna, dima baiwa e sai debama obu ema osowe ituana? Me wano ne duwa bedewe wainedina tane dima baiwa e dewasaano me otopa bolen?”

<sup>21</sup> Ita me walama natadea oto osowelene danawa tonbodene osowe itulene Iawe God

mampe mukalene wanase, “Iawe ne Godna, ne menanede e oto ema ina leusae wanaa!”

<sup>22</sup> Iawe God Elaia raupariwa etene ita oto ina waneno inalene wain.

<sup>23</sup> Ita Elaia oto wadenposie awanene neke asiasi iene alen. Ita du atowea wanwan bola debama bedewe inawa wanene wanase, “Ewee, otoa inawaa!”

<sup>24</sup> Tane oto inawa Elaia mampe wanase, “Tauma ne ateten e God perowetawa, ita Iawe God aiawa e moawo nosedia ipa ulaipa.”

## 18

### *Elaia ita Baal perowetawa gagalou*

<sup>1-2</sup> Ena nata bedewe Samaria tawowa bedewe unu mai wapona ita maraapore debamaia segalen. Tane maraapore enawa natadea bedewe Iawe God Elaia diene wanase, “E aite warere Eiab ewaa, ne unu tawo ema oso wapaaubepa baiwantedina.” Ita me warere Eiab mampe alene donsan.

<sup>17</sup> Ita me alene wiseno Eiab ewene diene wanase, “E ipa sa Israelwa osouwo poka ituiana apanawa, ba?”

<sup>18</sup> Elaia leusane wanase, “Ne mai Israelwa osouwo poka itupona tane e ita e mamaa damba do dewa ema dewaiten. E Iawe God anaanawa mai ruawaitapona ita eida Baal godiwa wadaposimoile.”

<sup>19</sup> Tauma e Israel apanawa uduudu diamowo wimpu wadi Kamel iwa oso doineapu. Ita e ione Baal perowetawa uduudu 450 ita Asera

perowetawa 400 do winlena. Mo mida warere iwoa Iesebel nana wanamodia.

<sup>20</sup> Sa baiwa Eiab Israelwa uduudu ita peroweta diamona wadi Kamel iwa osowe antopue auwepu.

<sup>21</sup> Ita Elaia apala uduudu danauwo enene diamone wanase, “E walama dainea insaisala natamoilana enee insaisala dea ituna. Naita Iawe ipa God, aiawa ruawaitane wawoitana, tane naita Baal ipa God me wawoitana.” Ita apala mai aiau da wapona, dia.

<sup>22</sup> Mape Elaia mo mampo wanase, “Iawe God perowetawa neba os wainedina tane Baal perowetawa ipa 450.

<sup>23</sup> E kau mona nata otene mainimbo winlena. Mo kau dea wadapue mamposapu ita bosapue nopuiasapu. Tane mo pue pulotompa watawa osowe ia teamopue ita osowe moia teapu, tane ia mai supu. Ita ne kau da mampe deawaa dewasapa.

<sup>24</sup> Tane e Baal perowetawa, godila mampe rau-paritana ita ne Iawe God mampe rauparintapa. Ita god dainea raupari sipoasapie ia wapiaubepio moia ia do ituialepia me ulaipa Godida!” Ita apala uduudu oanton.

<sup>25</sup> Tane Elaia Baal perowetawa mampo gagalolene wanase, “E apala uaraitena baiwa bauta puloitana. Ita e kau dea sonabene imaitane otamone wata osowe teana tane ia mai suna ita godila mampe rauparitana.”

<sup>26</sup> Sa baiwa mo kau dea wadane imasane pulo ituia watawa osowe ituiena. Ita mo Baal mampe tadinaida rauparintoio alene enautalen. Mo mukantoie waiase, “O Baal, no rauparimba

sipoasaa!” Ita mo pue pulontompa watawa de-wasaiena tampeinta biantoie. Tane mai raupari sipoa da, diaida.

<sup>27</sup> Ita enautaleidio Elaia mo wasimone wanase, “Mukaitane rauparitana! Me ulaipa godida! Me dauwa insaisawa uaraleide ba nambe alen ba awa da alen. Ba naita me ituleidia wanamesano enepiwisepi!”

<sup>28</sup> Mo mukantoie rauparintoie ita mo dewau rua isima mampe etepu toie ita e mampe etepu eneio osina debama esa rua noseidie.

<sup>29</sup> Mo ideita ka osowe osowe waio rawilen ita pue susuwa walamaida wisen, tane mai aia da, mai mida da sipoalepona, diaida.

<sup>30</sup> Tauma Elaia apava diamone wanase, “E mainawo winlena.” Ita mo uduudu me mampe wimone enanepaneiena. Ita me Iawe God watawa apava da kadisana osowe dewasan.

<sup>31</sup> Me seu uduudu 12 otamon ita seu sa ipa Israel damba deadea eueuwau. Ebo ema Israel Iawe God mo nosiu Iakob wanen.<sup>✳</sup>

<sup>32</sup> Me seu sa mampe pulontompa watawa osowe dewasan Iawe God wadaposiwa baiwa. Ita me wata tampeinta don tone panen. Don sa bedewe esa memepuo 14 lita wadepia rua.

<sup>33</sup> Ita me ia tonapu wata osowe teamone ita kau nopolialene otene ia osowe teamon.

Ita me wanase, “E dugi debamau 4 bedewe esa memamono nopenopuo pulo ita ia osowe memamona.”

<sup>34</sup> Mo epe dewantoiено ita me wanase, “E osowe deawaa dewasana.” Ita mo dewasane diasaieno wanase, “E tauma osowe natadeawa

<sup>✳</sup> **18:31:** Bumpai 32.28; 35.10

memena.” Sa baiwa mo esa natadeawa memeiena me wana rua.

<sup>35</sup> Ita esa wata osowe iene alene don nopesan.

<sup>36</sup> Tane rawileidio pue pulontopua walamawa wiseno Elaia wata mampe alene enene raupari-lene wanase, “Iawe God, Abraam, Aisak ita Iakob Godiu, ande e sabamoitaa e ipa God Israel bedewe ita ne ipa e nolaa dewalala, ita dewa ema uduudu e waana rua ne dewamona.

<sup>37</sup> O Iawe God ne rauparina e sipoasaa, ne rauparina e sipoasawo apana ema atenepu e ipa Iawe God, tane e ipa mo nuau leusaiana manawontopu.”

<sup>38</sup> Me epe rauparileno Iawe God uboo ia iilala wanaubeno iene kau, ia, seu ita dogo wata tampe tane do esa don bedewe ituiamono makolene dialen.

<sup>39</sup> Tane apana dewa ema ewane, mo nambu dogo osowe udanadoe ke wane waienase, “Iawe God, me ipa God! Iawe God, me ipa God!”

<sup>40</sup> Ita Elaia aiawa badowa mampe diamone wanase, “E Baal perowetawa wadaitumona mai da eno alepi!” Sa baiwa mo uduudu wadaitumoienna ita Elaia banlamone Kison dobawa apua oso antone bomonatuwaiena.

### *Elaiaunu baiwa rauparilen*

<sup>41</sup> Ita Elaia Eiab mampe wanase, “E aie nana ita esa naa, ne unu debama iedio moinawa etedina.”

<sup>42</sup> Eiab alene nana ita esa nan ita Elaia wadi Kamel iwa osowe odene alene nitomalene namba imimpa osowe udendoe rauparilen.

<sup>43</sup> Ita me nolawa dewalala mampe wanase, “E aie owa deneuwe ewawo.”

Ita nola dewalala alene ewene leulene wisene Elaia diene wanase, “Ne antene mai dima da ewapona.”

Elaia nolawa dewalala dieno walama 7 os-oweosowe alene ewen.

<sup>44</sup> Ita walama 7 bedewe nola dewalala wanase, “Ne giou keraudida apapa witapa rua owa be-dewe odedio ewana.”

Sa baiwa Elaia wanase, “E aite Eiab diaa, e unu bodeepia sawa turakaa pue teiteinalala osowe odee wane duawo aitaa.”

<sup>45</sup> Tane tauwadea uba tampe giou dubalen. Ita lanunu weuwane unu debama nosen. <sup>✳</sup> Eiab turakawa pue mampe teiteinalala osowe waine bola Iesiriel bedewe alen.

<sup>46</sup> Tane Iawe God Elaia muka debamaia waneno garawa nukulene igawa bedewe ensipusalen. Ita me weuwane alene Eiab ainboe Iesirielwa wisen.

## 19

### *Elaia sawe wadi Sainai bedewe aleide*

<sup>1</sup> Eiab alene duwa wisene dewa uduudu Elaia dewamona ita ambi Baal perowetawa uduudu bomona umanawa manainapa Iesebel dieno eten.

<sup>2</sup> Iesebel dewa ema umanawa etene Elaia gagalowa wanaubene wanase, “Imonepi omo ema rua e Baal peroweta bomoana rua ne e boepa. Naita ne mai epe dewanteapa, ne godina mampo rau-parintedina ne matangelaneapue do boneapu.”

<sup>3</sup> Elaia ema umanawa etene inalepia insene sawe alen. Ita me Iuda bedewe wisene nolawa dewalala bola Beasiba bedewe en.

---

<sup>✳</sup> **18:45:** Iems 5.18

<sup>4</sup> Ita me meba sala makowa bedewainta aleidio rawilen. Me ia ebowa burum bumpe waine bolepona menasano rauparilene wanase, “Iawe God ne pokaidanen.<sup>◊</sup> Ne inawana wadaaubewo bonteapa nosinosina bontoienia ruau.”

<sup>5</sup> Me epe rauparilene aupe ia bumpe ituawawalen.

Ita tauwadea Iawe God enseliwa wadenmesane wanase, “Enawie nana naa.”

<sup>6</sup> Me aia etene enenwisene sala ewen ita uwawe bured tabataba isana polapolaua osowe susulala ita esa dugiwa wineio ewamon. Ita me bured ita esa nane tane osowe itulen.

<sup>7</sup> Tane Iawe God enseliwa osowe me wadenmesane wanase, “Enawie nana naa. Naita dia e mai rua inta dauma aita.”

<sup>8</sup> Sa baiwa me enene bured ita esa namon. Ita me nana sa nane muka waneno walama 40 ita tadina 40 alen God wadiwa wadi Sainai osowe wisen.

<sup>9</sup> Ita sape me wisene tadinaleno guba bedewe itulen.

### *Iawe God Elaia mampe gagalolen*

Iawe God me diene wanase, “Elaia, e dima baiwa mape wien?”

<sup>10</sup> Elaia me sipoasane wanase, “Iawe God Mukamukaua, ne walama uduudu e os simbiaedine. Tane Israelwa e sauua badowa dabuasaiena ita pulontompa watawa epakokomoiena ita do e perowetaa uduudu bomonatuaiena. Ne os wainedina ita tauma mo ne boneapua baiwantoi.”<sup>◊</sup>

<sup>11</sup> Tane Iawe God me diene wanase, “E aite wadi iwa osowe nainanepe enaa.”

---

<sup>◊</sup> **19:4:** Iona 4.3    <sup>◊</sup> **19:10:** Rom 11.3

Ita Elaia enedio Iawe God nosene alen ita lanunu debamaia wisene wadi epeno nau tutuwaiena. Tane Iawe God ipa mai lanunu bedewe, dia. Ema aupe wanatata uwen, tane Iawe God mai wanatata sa bedewe, dia.

<sup>12</sup> Tane wanatata aupe ia debama iilala wisene alen. Tane me mai ia sa bedewe, dia. Ia ema aupe aia kerauda asibenebenema wadio eten.

<sup>13</sup> Ita Elaia asibenebenema moinawa etene garawa onapea teineno odene namba rupusan ita nosene alene guba moape enedie. Tane aia me mampe wane wanase, “Elaia, e dima baiwa mape wien?”

<sup>14</sup> Tane me sipoasane wanase, “Iawe God Mukamukaua, ne walama uduudu e os simbiaedine. Tane Israel apanawa e sauaa badowa dabuasaiena ita pulontompa watawa epakokomoiena ita do e perowetaa uduudu bomonatuwaiena. Ne os wainedina ita tauma mo ne boneapua baiwantoi.”

<sup>15</sup> Ita Iawe God me diene wanase, “E leuite inta wienawo asiisi sala makowa bola debama Damaskas tampe aitaa. Ita bola sa debama bedewe odee mena Asael osowe memee euwasa me ando tawo Siria warereu segalepi.

<sup>16</sup> Tane Nimsi otopa Ieru osowe mena memee euwasa me ando Israel apanawa warereu segalepi. Ita Sapat otopa Elaisa bola Abel Meola apanawa osowe mena memee euwasa me ando e aupaa wadepie ne perowetana segalepi.

<sup>17</sup> Apana mida Asael bosapia sawa alepia Ieru me bosapi. Tane mo mida Ieru bomopua sawantopue antopua Elaisa mo bomopi.

<sup>18</sup> Tane Israel apanawa 7,000 mo mida mai Baal wadaposisapona ba kokoitauwa isuruwasapona, mo os waimompa.”<sup>◇</sup>

*Iawe God Elaisa apasan*

<sup>19</sup> Tane Elaisa alene Sapat otopa Elaisa iraiwa bedewe dogo nobaleidio donsan. Sape apana uduudu 12 muba kaibu natanata otamone iraibu bedewe nolantoie ita Elaisa kau nata sa ompa otamone dogo nobaleidie. Elaisa me mampe alene garawa onapea dauma wadene Elaisa awanapa osowe itune ene alen.

<sup>20</sup> Tane Elaisa nolaleidia kauwa nata emone Elaisa wawe alene diene wanase, “Bauta ne antape mamana ita inana isuruwamope ita auwamope epe wimpo nata ana!”

Elaisa me sipoasane wanase, “Leuite aita ita ne e manawo dima dewamona insamona.”

<sup>21</sup> Ita Elaisa leulene alen kauwa nata epaboiamon. Tane kau ia teineio dogo nobaleidia otene denalene moia sune ita apana wanamono naiena. Ita me alene Elaisa warorosane nolawa dewalala segalen.

---

<sup>◇</sup> **19:18:** Rom 11.4

**Ina Sanaa Gagalowa  
The New Testament in the Kanasi Language of Papua  
New Guinea  
Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Mar 2025 from source files  
dated 31 Aug 2023

b27bd40e-e091-5268-bcbf-8232e1d7501a